

an den Leser.

Die Flamme der Ampel so da bran/  
Niemandts anfangs außleschen kan.  
Weder mit blast noch feuchtn Sachn/  
Bis man ins Geschirr thet Löcher machn.  
Das Luft eingieng/das lasch sie auß.  
Der Leichnam scheußlich vnd mit grauß.  
Vnter Lachtrauff geworffen dar/  
Auff Gassen/ da erfault er gar.

Item Gualterus Rivius Medic. D. schreibt auch vber  
das 8. Buch Vitruvii de architectura cap. 1. Daz zu sei-  
ner zeit in der Landschaft Bergamo in Welschland von  
den Bauersleuten ein sehr altes/ vnd verfallenes Heido-  
nisches Grab mit einem köstlichen Schatz gefundē wor-  
den/ vnd darbey ein Gläsern Gefäß/ darinnen ein bren-  
nend Lichtlein gewest/ vnd wol etliche 100. Jar daselbst  
verborgen gelegē/ dessen sich die Leute sehr verwundert/  
vnd auß vnbemerktem fürwitz haben sie sehen wollen/  
wovon sich das Lichtlein erhalte/ vnd als sie das Ge-  
fäßlein eröffnet/ vnd Luft bekommen/ ist es mit grosser  
Kewe derer so diß Wunderwerck gesehen/ verloschen.

Wie dann/ so einer die opticam für sich nimt/ kan er  
viel wunder seltsam Dinge zu wegen bringen/ welche  
nicht viel Leute gesehen oder gehört haben/ denn es nit  
in eines jeden Kopff geht/ vnd kostet auch Geld. Ist de-  
rowegen viel besser für grosse Herrn/ die es zum schimpff  
vnd ernst wol gebrauchen mögen.

B 3

Als